

Na osnovu člana 10. i 12. Zakona o udruženjima i fondacijama Bosne i Hercegovine ("Službeni glasnik BiH", br. 32/01, 42/03, 63/08, 76/11 i 94/16), i člana 31. Statuta, IV vanredna Skupština Udruženja fizioterapeuta u Bosni i Hercegovini, održana 25.03.2017. godine u Sarajevu, usvojila je novi:

# **S T A T U T**

## **Udruženja fizioterapeuta u Bosni i Hercegovini**

### **I OPŠTE ODREDBE**

#### **Član 1.**

Udruženje fizioterapeuta u Bosni i Hercegovini (u daljem tekstu: Udruženje) je nevladino, nestranačko i neprofitno udruženje zasnovano na slobodnom povezivanju i udruživanju građana radi ostvarivanja zadanih ciljeva i djelatnosti utvrđenih ovim Statutom i Zakonom o udruženjima i fondacijama Bosne i Hercegovine (u daljem tekstu: Zakon).

#### **Član 2.**

U skladu sa članom 12. Zakona ovim Statutom uređuje se slijedeće:

- a) puni naziv, sjedište i adresa Udruženja;
- b) ciljevi i djelatnosti;
- c) postupak za primanje i isključivanje članova;
- d) organi udruženja, postupak i način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove sjednicu, uslovi i način raspuštanja odnosno prestanka rada;
- e) postupak za izmjene i dopune statuta, ovlaštenja i donošenje drugih općih akata Udruženja;
- f) javnost rada;
- g) način podnošenja finansijskog izvještaja i izvještaja o radu;
- h) pravila za ostvarivanje, korištenje i raspolaganje sredstvima Udruženja, kao i organ koji je ovlašten za nadzor nad korištenjem tih sredstava;
- i) opis znaka, oblik i sadržaj pečata
- j) zastupanje Udruženja;
- k) uslovi i postupak spajanja i podjele odnosno prestanak rada Udruženja, uključujući bilo kakav poseban kvorum ili pravila kvalifikovane većine i postupak glasanja;
- l) postupak za raspolaganje preostalim imovinom ili drugim sredstvima u slučaju raspuštanja ili prestanka rada Udruženja;
- m) ostala pitanja u vezi rada i djelovanja Udruženja, u skladu sa Zakonom i ovim Statutom.

## **II NAZIV, SKRAĆENI NAZIV, SJEDIŠTE I ADRESA UDRUŽENJA**

### **Član 3.**

(1) Puni naziv Udruženja glasi:

Udruženje fizioterapeuta u Bosni i Hercegovini  
Udruga fizioterapeuta u Bosni i Hercegovini  
Удружење физиотерапеута у Босни и Херцеговини

(2) Skraćeni naziv Udruge je : UfuBiH, УфуБиХ, UfuBiH

(3) Službena upotreba naziva je na ćirilichnom i latiničnom pismu.

### **Član 4.**

Sjedište Udruge je: ulica Ćamila Avdića broj 31, Sarajevo.

### **Član 5.**

(1) Udruženje je nevladina neprofitna organizacija koja nema namjeru sticati profit.

(2) Udruženje djeluje na cijeloj teritoriji Bosne i Hercegovine.

### **Član 6.**

Udruženje može promijeniti naziv, sjedište i znak, o čemu odluku donosi skupština Udruženja u skladu sa Zakonom i ovim Statutom.

### **Član 7.**

Udruženje ima svojstvo pravnog lica sa pravima, obavezama i odgovornostima danom upisa u registar kod nadležnog Ministarstva.

## **III OBLIK, SADRŽAJ PEČATA I ZNAKA UDRUŽENJA**

### **Član 8.**

(1) Pečat Udruženja je okruglog oblika, promjera 40 mm u čijem je obodu ravnomjerno ispisan tekst punog naziva Udruženje na latiničnom i ćirilichnom pismu i to: Udruženje fizioterapeuta u Bosni i Hercegovini, a u sredini pečata nalazi se ispisan skraćeni naziv Udruženja i to: UfuBiH i sjedište Udruženja: Sarajevo.

## **Član 9.**

- (1) Udruženje može imati više pečata, s tim što svaki mora biti numerisan brojevima.
- (2) O čuvanju i upotrebi pečata stara se predsjednik Udruženja.

## **Član 10.**

- (1) Udruženje ima Znak/logo

Znak udruženja je plavo-žute boje. Znak predstavlja čovjeka u pokretu. Oko znaka ispisan je tekst sa punim nazivom Udruženja i to: Udruženje fizioterapeuta u Bosni i Hercegovini, a ispod znaka ispisan je skraćeni naziv Udruženja i to: UfuBiH.

## **IV CILJEVI I DJELATNOSTI**

### **Član 11.**

Ciljevi i djelatnosti Udruženja su:

- rad na postizanju najviših standarda kvaliteta procesa fizioterapije kao i obrazovanja fizioterapeuta;
- osiguranje uslova za publiciranje radova i knjiga članova Udruženja, u skladu sa Zakonom;
- podsticanje na stalno usavršavanje instrumenata fizioterapije kroz lični razvoj članova Udruženja;
- promicanje osnovnih vrijednosti fizioterapije usmjerene čovjeku kao i cjelovitom biću;
- stručno i znanstveno usavršavanje članova Udruženja;
- saradnja sa istim zdravstvenim stručnim, znanstvenim i nastavnim organizacijama, u zemlji i inostranstvu;
- predlaganje nadležnim institucijama popise, koji se odnose na organizaciju obrazovanja i profesionalni status fizioterapeuta;
- saradnja sa obrazovnim institucijama za fizioterapeute po pitanjima, koja se tiču dodiplomske i specijalističke diplomske obrazovanosti fizioterapeuta;
- promocija fizioterapije kao i sudjelovanje u društvenim akcijama, koje se tiču zdravlja;
- izdavanje brošura, letaka, časopisa, knjiga i drugih publikacija, u skladu sa Zakonom.

### **Član 12.**

Udruženje može obavljati privredne djelatnosti koje su neposredno povezane sa ciljevima Udruženja iz člana 11. Statuta i osnovati posebno pravno lice, u skladu sa Zakonom.

## **V ČLANSTVO UDRUŽENJA**

### **Član 13.**

- (1) Osnivači Udruženja stekli su svojstvo člana Udruženja danom upisa Udruženja u Registar udruženja.

(2) Članovi Udruženja mogu biti fizičke osobe, državljani Bosne i Hercegovine, kao i strani državljani koji imaju odobreno boravište u Bosni i Hercegovini, koji su fizioterapeuti u Bosni i Hercegovini, a do odlaska u mirovinu.

(3) Članovi mogu biti i pravne osobe - udruženje koja su registrovana u Bosni i Hercegovini, a čiji članovi ispunjavaju uslove iz stavka (2) ovog člana, i ako prihvate Statut i ciljeve i djelatnosti Udruženja.

Pravne osobe učestvuju u radu Udruženja putem svog delegiranog predstavnika.

#### **Član 14.**

(1) O prijemu u članstvo odlučuje Skupština.

(2) Članovi udruženja mogu biti:

- a) Stalni članovi
- b) Pridruženi članovi
- c) Počasni članovi
- d) Izvanredni članovi

#### **Član 15.**

Stalni članovi su fizičke i pravne osobe iz članka 13. ovog Statuta, a koja su stekla svojstvo člana Udruženja.

#### **Član 16.**

(1) Za stupanje u članstvo podnosi se pristupnica na propisanom obrascu. Primljeni član se upisuje u evidenciju članstva.

(2) Udruženje je dužno voditi spisak svojih članova.

(3) Udruženje vodi spisak svih svojih članova i evidenciju svih članova Udruženja u elektronskoj formi i sadrži:

- ime i prezime, odnosno naziv člana Udruženja sa adresom prebivališta, odnosno sjedišta;
- datum pristupanja;
- vrstu članstva, i
- prestanak članstva.

(4) Spisak svih članova Udruženja će biti dostupan na web stranici Udruženja.

#### **Član 17.**

(1) Pridruženi član može biti svaka fizička ili pravna osoba koja na drugi način pomaže rad Udruženje.

(2) Pridruženi članovi nemaju pravo glasa, oni u radu Udruženja imaju savjetodavnu funkciju.

(3) Počasni član može postati istaknuti stručnjak iz zemlje i inozemstva na području fizikalne terapije. Naziv počasnog člana dodjeljuje skupština Udruženja na prijedlog Upravnog odbora i isti nemaju pravo glasa.

(4) Izvanrednim članom mogu biti fizioterapeuti iz inozemstva te stručnjaci iz zemlje i inozemstva, čija se djelatnost odnosi na stručno i znanstveno područje srodno fizikalnoj terapiji, a nemaju pravo glasa. Njihova funkcija je savjetodavna.

### **Prestanak članstva**

#### **Član 18.**

Članstvo u Udruženju prestaje:

- a) Na osobni zahtjev, potpisivanjem izjave o istupanju iz Udruženja.
- b) Isključenjem u slučaju djelovanja u suprotnosti sa ciljevima i djelatnostima i Statutu Udruženja.
- c) Smrću člana.
- d) Prestankom svojstva pravne osobe.

#### **Član 19.**

Svaki član Udruženja može slobodno istupiti iz članstva. Sa odlukom člana Udruženja o istupanju iz članstva, upoznaje se predsjednik Udruženja, nakon čega se vrši evidentiranje istupanja.

#### **Član 20.**

(1) Član Udruženja može biti isključen u slučaju djelovanja člana u suprotnosti sa ciljevima i djelatnostima i Statutom Udruženja.

(2) Incijativu za isključenje može podnijeti bilo koji član Udruženja.

(3) Prije donošenja odluke o isključenju, član Udruženja mora biti pismeno obavješten o prijedlogu za isključenje, kao i o razlozima zbog kojih se predlaže isključenje.

(4) O isključenju odlučuje Upravni odbor Udruženja.

(5) Na odluku o isključenju, isključeni član ima pravo žalbe Skupštini Udruženja u roku od 15 dana od dana prijema predmetne odluke.

(6) Po žalbi odlučuje Skupština u roku od 15 dana od dana prijema žalbe, natpolovičnom većinom prisutnih članova.

## **VI PRAVA, DUŽNOSTI I ODGOVORNOSTI STALNIH ČLANOVA**

### **Član 21.**

Prava stalnih članova Udruženja su:

- a) da aktivno učestvuju u radu Udruge i ostvarivanju njegovih ciljeva;
- b) da biraju i budu birani u organe udruženja;
- c) da budu redovno i blagovremeno obavješteni o aktivnostima udruženja;
- d) da saraduju sa ostalim članovima udruženja;
- e) da ostvaruju druga prava i obaveze utvrđene ovim Statutom i drugim općim aktima Udruženja.

### **Član 22.**

Dužnosti stalnih članova Udruženja su:

- a) da učestvuju u aktivnostima Udruženja da savjesno i odgovorno izvršavaju povjerene poslove i zadatke u vezi sa radom i aktivnostima Udruženja;
- b) da propagiraju djelatnost Udruženja, a posebno značaj njegovih programskih ciljeva;
- c) da redovno izvršavaju preuzete obaveze prema Udruženju i provode odluke, stavove i zaključke organa Udruženja;
- d) da se pridržavaju odredaba ovog Statuta.

### **Član 23.**

Oblici odgovornosti članova će se definisati Etičkim kodeksom kojeg donosi upravni odbor Udruženja.

Svaki član Udruženja može pokrenuti postupak pred nadležnim sudom za utvrđivanje ništavosti općeg akta Udruženja, koji je donijet suprotno odredbama Statuta ili drugog općeg akta Udruženja, a najkasnije u roku od šest mjeseci od dana donošenja tog akta.

## **VII ORGANI UDRUŽENJA**

### **Član 24.**

Organi udruženja su:

1. Skupština
2. Upravni odbor Udruženja
3. Predsjednik Udruženja
4. Odbor za obrazovanje i usavršavanje Udruženja
5. Odbor za etiku Udruženja
6. Blagajnik Udruženja
7. Sekretar Udruženja

## 1. Skupština

### **Član 25.**

- (1) Skupština je najviši organ Udruženja, koju čine svi stalni članovi.
- (2) Radom skupštine rukovodi predsjednik skupštine, kojeg bira i razrješava skupština.
- (3) Mandat predsjednika skupštine traje četiri godine a mogućnošću reizbora.

### **Član 26.**

- (1) Skupština udruge može biti redovna i vanredna.
- (2) Redovna skupština se sastaje po potrebi, a najmanje jednom u toku kalendarske godine i ima za cilj kontrolu rada putem razmatranja godišnjeg izvještaja o radu Udruženja.
- (3) Vanredna skupština saziva se izuzetno, u slučaju nepredviđenih teškoća u radu, poremećaja međuljudskih odnosa u organizaciji ili drugih okolnosti kada je ugrožen rad i vitalni interesi Udruženja ili ukoliko se sazivanje vanredne skupštine smatra neophodnim ili potrebnim za vršenje određenih dužnosti skupštine.
- (4) Vanrednu skupštinu može sazvati predsjednik skupštine. Predsjednik Skupštine je dužan sazvati vanrednu skupštinu i onda kada to zahtjevaju najmanje 1/3 članova Skupštine Udruženja ili Upravni odbor Udruženja.
- (5) Način rada skupštine pobliže se utvrđuje Poslovníkom o radu Skupštine.

### **Član 27.**

- (1) Skupštinu saziva predsjednik skupštine najkasnije 15 dana prije njenog održavanja.
- (2) Predsjednik skupštine je dužan sazvati skupštinu u slučaju kada to zahtjeva najmanje 1/3 članova skupštine, ili kada to zatraži Upravni odbor Udruženja.

### **Član 28.**

- (1) Radom sjednice skupštine rukovodi predsjednik skupštine.
- (2) Skupština bira zapisničara na početku rada sjednice koji vodi zapisnik. Zapisnik mora da odražava bitan tok rada i suštinu svih odluka i stavova skupštine.
- (3) Predsjednik skupštine je ovlašten i dužan da:
  - a) stara o organizovanju skupštine i saziva njene sjednice,
  - b) predlaže dnevni red sjednice,

- c) predsjedava sjednicama skupštine,
- d) potpisuje akte donesene na skupštini
- e) stara o izvršenju odluka, zaključaka i drugih akata sa koje je donijela Skupština Udruženja Zakonom i ovim Statutom.

### **Član 29.**

- (1) Skupština radi i odlučuje u skladu sa Statutom i Poslovnikom o radu.
- (2) Kvorum Skupštine je nadpolovična većina svih članova skupštine Udruženja.
- (3) Skupština punovažno odlučuje natpolovičnom većinom prisutnih članova skupštine Udruženja, ukoliko ovim statutom nije drugačije određeno, odnosno da je za određena pitanja potrebna kvalifikovana većina.
- (4) Glasanje na sjednici je javno, izuzev ukoliko skupština na samoj sjednici ne utvrdi drugačije.

### **Član 30.**

Skupština u svojoj nadležnosti donosi:

- a) statut Udruženja, njegove izmjene i dopune i druga opća akta određena Statutom,
- b) odlučuje o spajanju, podjeli i prestanku rada Udruge, osnivanju drugih pravnih lica, kao i drugim statusnim promjenama Udruženja,
- c) odlučuje o isključenju članova Udruge u drugostepenom postupku u skladu sa Statutom i Zakonom
- d) donosi Odluku o promjeni naziva, sjedišta i znaka Udruženja,
- e) donosi Poslovnik o radu skupštine,
- f) bira i razrješava predsjednika skupštine, članove upravnog odbora, predsjednika i sekretara Udruženja i blagajnika Udruženja,
- g) usvaja godišnji program i plan rada Udruženja,
- h) usvaja izvještaje o radu i finansijski izvještaj ,
- i) donosi odluku o visini i načinu plaćanja članarine,
- j) donosi odluku o ovlaštenom licu za zastupanje Udruženja u pravnom prometu,
- k) usvaja završni račun,
- l) daje autentično tumačenje ovog Statuta,
- m) odlučuje o proglašenju počasnih članova Udruženja i
- n) obavlja druge poslove koji nisu stavljeni u nadležnost drugih organa Udruženja.



## 2. Upravni odbor

### **Član 31.**

- (1) Udruženje ima upravni odbor koji ima sedam članova, predsjednika i šest članova, a koje bira i razrješava skupština, u skladu sa ovim Statutom.
- (2) Radom upravnog odbora rukovodi predsjednik upravnog odbora, kojeg bira i razrješava skupština.
- (3) Mandat upravnog odbora je četiri godine sa mogućnošću reizbora.

### **Član 32.**

Upravni odbor je za svoj rad odgovoran skupštini sukladno Zakonu, i ovim Statutom i drugim aktima Udruženja.

### **Član 33.**

- (1) Upravni odbor radi u sjednicama. Sjednice upravnog odbora saziva predsjednik upravnog odbora najkasnije 15 dana prije njenog održavanja.
- (2) Predsjednik upravnog odbora je dužan sazvati sjednicu u slučaju kada to zahtjeva najmanje 1/3 članova upravnog odbora.

### **Član 34.**

- (1) Radom sjednice rukovodi predsjednik upravnog odbora.
- (2) Upravni odbor bira zapisničara na početku rada sjednice koji vodi zapisnik. Zapisnik mora da odražava bitan tok rada i suštinu svih odluka i stavova upravnog odbora.
- (3) Predsjednik upravnog odbora je ovlašten i dužan da:
  - a) stara o organizovanju sjednice upravnog odbora i saziva njegove sjednice,
  - b) predlaže dnevni red sjednice upravnog odbora,
  - c) predsjedava sjednicama upravnog odbora,
  - d) potpisuje akte donesene na sjednici upravnog odbora
  - e) stara o izvršenju odluka, zaključaka i drugih akata sa Zakonom i ovim Statutom.

Predsjednik Upravnog odbora je ujedno i predsjednik Udruženja.

### **Član 35.**

- (1) Upravni odbor radi i odlučuje u skladu sa Statutom.
- (2) Kvorum upravnog odbora je natpolovična većina svih članova upravnog odbora.

(3) Upravni odbor punovažno odlučuje natpolovičnom većinom prisutnih članova upravnog odbora, ukoliko ovim statutom nije drugačije određeno, odnosno da je za određena pitanja potrebna kvalifikovana većina.

(4) Glasanje na sjednici je javno, izuzev ukoliko upravni odbor na samoj sjednici ne utvrdi drugačije.

### **Član 36.**

Upravni odbor Udruženja ima slijedeća prava, dužnosti i odgovornosti:

- a) provodi politiku, zaključke i druge odluke koje je donijela skupština;
- b) vodi poslovanje i donosi odluke u okviru programa rada i planova razvoja Udruženja;
- c) određuje izvedbene planove i radne zadatke;
- d) donosi odluke o svim pitanjima koja se odnose na tekuću aktivnost Udruženja, izuzev pitanja koja spadaju u isključivu nadležnost skupštine;
- e) odgovoran je za zakonitost i poslovanje Udruženja;
- f) priprema sjednice Skupštine;
- g) priprema nacrt godišnjeg programa i plana rada Udruženja i podnosi ga skupštini Udruženja na usvajanje;
- h) priprema nacrt izvještaja o radu i finansijskog izvještaja Udruženja i podnosi ga skupštini Udruženja na usvajanje;
- i) priprema nacrt statuta i drugih akata koje donosi skupština Udruženja;
- j) odlučuje o isključenju članova Udruženja u prvostepenom postupku u skladu sa Statutom i Zakonom;
- k) upravlja imovinom Udruženja, i
- l) ima i druga prava i obaveze utvrđene opštim aktima Udruženja i Zakonom i one koje im stavi u nadležnost skupština Udruženja.

### **Član 37.**

(1) Članovi upravnog odbora mogu biti razriješen dužnosti prije isteka mandata na koji su imenovani, i to:

- a) na sopstveni zahtjev;
- b) ako pravilno ne obavljaju poslove i zadatke članova Upravnog odbora;
- c) u drugim slučajevima predviđenim Zakonom i ovim Statutom.

(2) Inicijativu za razrješenje članova upravnog odbora može dati 1/3 članova Skupštine.

### 3. Predsjednik Udruženja

#### **Član 38.**

Poslovima i aktivnostima Udruženja upravlja Predsjednik Udruženja, kojeg imenuje i razrješava Skupština, sukladno ovim statutom.

Mandat Predsjednika Udruženja je četiri godine sa mogućnošću reizbora.

Predsjednik Udruženja je ujedno i predsjednik Upravnog odbora Udruženja.

#### **Član 39.**

Predsjednik Udruženja je za svoj rad odgovoran Skupštini sukladno zakonskim propisima i ovim Statutom i drugim aktima udruženja.

#### **Član 40.**

Predsjednik Udruženja ima sljedeća prava, dužnosti i odgovornosti:

- zastupa Udruženje u pravnom prometu,,
- provodi politiku i druge odluke koje je donijela Skupština i Upravni odbor Udruženja,
- naredbodavac je u izvršenju finansijskog plana,
- vodi poslovanje i donosi odluke u okviru programa rada i planova razvoja Udruženja,
- određuje izvedbene planove i radne zadatke,
- odgovoran je za zakonitost i poslovanje Udruženja,
- prati realizaciju finansijskog plana Udruženja,
- izvršava odluke Skupštine i Upravnog odbora Udruženja,
- donose Pravilnik o disciplinskoj odgovornosti
- ima i druga prava i obaveze utvrđene opštim aktima Udruženja i zakonom i koje im stavi u nadležnost Skupština udruženja.

#### **Član 41.**

Predsjednik Udruženja može biti razrješena dužnosti prije isteka vremena na koje je imenovan i to:

- Na sopstveni zahtjev;
- Ako pravilno ne obavlja poslove i zadatke Predsjednika Udruženja;
- U drugim slučajevima predviđenim Zakonom i ovim Statutom.

Inicijativu za razrješjenje Predsjednika Udruženja može dati 1/3 članova Skupštine i Upravni odbor Udruženja.

Predsjednik Udruženja je ovlašten da donosi odluke po svim pitanjima koja se odnose na tekuću aktivnost Udruženja, izuzev pitanja koja spadaju u nadležnost Skupštine.

## Odbor za obrazovanje i usavršavanje

### **Član 42.**

(1) Odbor za obrazovanje i usavršavanje čine predsjednik Odbora, tajnik Odbora, predstavnik visokoškolskih institucija i svi predsjednici stručnih Sekcija Udruge.

Članove Odbora za obrazovanje i usavršavanje bira Skupština na mandat od četiri godine sa mogućnošću reizbora.

Rad Odbora za obrazovanje i usavršavanje je reguliran Pravilnikom o radu odbora za obrazovanje i usavršavanje.

(2) Zadaci Odbora za obrazovanje i usavršavanje su da:

- Predlaže Skupštini Pravilnik o radu Odbora za obrazovanje i usavršavanje,
- Donosi Pravilnik o usavršavanju fizioterapeuta, Pravilnik o nagrađivanju, te Kriterije za sudjelovanje fizioterapeuta na tečajevima u organizaciji Udruženja, kao i materijalnu potporu,
- Donosi Kalendar stručnih skupova za godinu dana unaprijed,
- Donosi odluke o bodovanju svakog prijavljenog stručnog skupa,
- Predlaže Upravnom odboru Odluku o potpori članovima Udruženja za usavršavanje u zemlji i inozemstvu na prijedlog stručnih sekcija,
- Prati stručne aktivnosti članova Udruženja, sustavom bodovanja, i
- Utvrđuje listu članova sekcija Udruženja, za godišnja priznanja i nagrade, u skladu sa odredbama Pravilnika o nagrađivanju.

## Odbor za etiku

### **Član 43.**

(1) Odbor za etiku sastoji se od predsjednika Odbora za etiku i četiri redovna člana Udruženja. Predsjednik i članove Odbora za etiku bira skupština na prijedlog Upravnog odbora na mandat od četiri godine sa mogućnošću reizbora.

Odluke se donose konsenzusom.

Rad odbora za etiku je reguliran je Pravilnikom o radu Odbora za etiku.

(2) Odbor za etiku:

- Predlaže Skupštini etički kodeks, te njegove izmjene i dopune,
- Donosi Pravilnik o disciplinskom postupku,
- Nadzire te promiče etička načela u radu fizioterapeuta u Bosni i Hercegovini,
- Provodi postupak isključenja iz Udruženja, i
- Razmatra prijave i žalbe članova Udruženja.

## Blagajnik Udruženja

### **Član 44.**

Glavni blagajnik rukovodi Blagajništvom Udruženja, koje čine: direktor Ureda za marketing Udruženja, voditelj svih projekata Udruženja, te ostalih ureda koje osnuje Upravni odbor za specifične poslove.

Rad Blagajništva Udruženja, regulisan je posbenim Pravilnikom.

Za poslove u području financija, koji zahtjevaju stručnu osobu, Upravni odbor može angažirati stručnjaka.

Glavni blagajnik predlaže Upravnom odboru Pravilnik o finansijskom poslovanju Udruženja, te finansijski plan.

Glavni blagajnik obavlja i druge poslove po nalogu Upravnog odbora, kojem podnosi pismeni izvještaj o finansijskom stanju jesečno, te godišnje pismeno izvještaj o radu.

Glavni blagajnik podnosi finansijski izvještaj na svakoj izbornoj sjednici Skupštine Udruženja.

## Sekretar Udruženja

### **Član 45.**

Udruženje ima sekretara koga bira i razrješava Skupština Udruženja na mandatni period od četiri godine sa mogućnosti reizbora.

sekretar obavlja sljedeće poslove:

- prikuplja i vodi evidenciju o članarini,
- vodi brigu o arhivi Udruženja,
- vodi zapisnik na sjednicama Upravnog odbora i Skupštine Udruženja,
- provodi inventuru osnovnih sredstava i sitnog inventara,
- vodi brigu o biblioteci,
- obavlja stručne, administrativne i knjigovodstvene poslove, u skladu sa Zakonom i principima racionalnog poslovanja.

Glavni sekretar rukovodi Tajništvom Udruge, koje se sastoji od voditelja:

Ureda za standarde, Ureda za međunarodne odnose, Ureda za usavršavanje, Ureda za promidžbu, Biblioteke Udruge, te ostalih ureda koje osnuje Upravni odbor Udruge za specifične poslove. Rad Tajništva Udruge, reguliran je posebnim Pravilnikom.

Glavni sekretar obavlja i druge poslove po nalogu Upravnog odbora kojem podnosi pismeno godišnje izvješće o radu.

## **VIII ZASTUPANJE UDRUŽENJA**

### **Član 46.**

- (1) Udruženje zastupa u pravnom prometu predsjednik Udruženja, u okviru ovlaštenja utvrđenim ovim Statutom i Zakonom.
- (2) Predsjednika Udruženja bira i razrješava Skupština u skladu sa ovim Statutom. Predsjednik Udruženja je ujedno i predsjednik Upravnog odbora.
- (3) Mandat predsjednika Udruženja i predsjednika Upravnog odbora Udruženja je četiri godine sa mogućnošću reizbora.

### **Član 47.**

U postupcima u kojima Udruženje sudjeluje kao stranka radi ostvarivanja svojih prava, dužnosti i odgovornosti pred nadležnim organima, Predsjednik Udruženja može dati pismenu punomoć advokatu za zastupanje ili drugoj stručnoj osobi.

## **IX KOMISIJE I RADNA TIJELA**

### **Član 48.**

- (1) Radi svestranog razmatranja i odlučivanja o pojedinim pitanjima iz djelokruga djelatnosti Udruge, skupština Udruge može obrazovati stalne ili povremene komisije.
- (2) Sastav i djelokrug komisije se utvrđuje odlukom skupštine Udruženja.

## **X PRIHODI I IMOVINA**

### **Član 49.**

Udruženje svoju imovinu stiče u skladu sa Zakonom i ovim Statutom iz sljedećih izvora:

- a) članarina;
- b) dobrovoljnih priloga i poklona javnih institucija, fizičkih i pravnih osoba, kako inostranih tako i domaćih, u gotovini, usluga ili imovini bilo koje vrste;
- c) državnih subvencija i ugovora sa državom, javnim institucijama, fizičkim i pravnim osobama, kako domaćim tako i inostranim;
- d) prihoda stečenih kroz ostvarivanje ciljeva i djelatnosti Udruženja;
- e) prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda; i
- f) iz drugih Zakonom dozvoljenih izvora.

## **Član 50.**

- (1) Ostvarivanje, korištenje i raspolaganje sredstvima Udruženja utvrđuje se finansijskim planom kojeg donosi skupština na prijedlog Upravnog odbora Udruženja.
- (2) O korištenju sredstava, u skladu sa finansijskim planom odlučuje Upravni odbor u skladu sa odredbama ovog Statuta.
- (3) Nadzor nad korištenjem sredstava vrši Skupština Udruženja.

## **XI NAČIN DONOŠENJA FINANIJSKOG IZVJEŠTAJA I IZVJEŠTAJA O RADU**

### **Član 51.**

- (1) Upravni odbor upućuje skupštini na razmatranje i usvajanje godišnji finansijski izvještaj i Izvještaj o radu Udruženja za prethodnu godinu.
- (2) Upravni odbor upućuje skupštini na razmatranje i usvajanje izvještaj o radu Udruženja.
- (3) Dokumente iz stavova (1) i (2) ovog člana skupština razmatra i usvaja na redovnoj godišnjoj, a ako je potrebno i vanrednoj sjednici skupštine.
- (4) Skupština donosi odluku o usvajanju godišnjeg finansijskog izvještaja natpolovičnom većinom glasova prisutnih članova.
- (5) Udruženje je dužna da vodi poslovne knjige podnosi finasijske izvještaje, u skladu sa propisima kojima se uređuje računovostvo neprofitnih organizacija.
- (6) Udruženje je dužno dostaviti finansijski i godišnji izvještaj o radu, nadležnom organu prema sjedištu udruge i Ministarstvu pravde Bosne i Hercegovine radi objave na internetskoj stranici Ministarstva, a najkasnije do 30.aprila tekuće godine za prethodnu poslovnu godinu.
- (7) Nad imovinom Udruženja može se provesti stečaj. Stečajni postupak provodi nadležni sud na čijem se području nalazi sjedište Udruženje, u skladu sa posebnim zakonima.

## **XII JAVNOST RADA**

### **Član 52.**

- (1) Rad Udruženja je javan. Javnost rada ostvaruje se neposrednim informisanjem i putem sredstava javnog informisanja za značajnije aktivnosti.

(2) Svim članovima omogućiti će se neometan uvid u obavljanje aktivnosti na svim područjima na kojima djeluje ovo Udruženje, kao i planiranje daljnjih aktivnosti.

### **Član 53.**

Članovi Udruženja moraju biti redovno informisani o radu Udruženja. Za javnost rada odgovoran je predsjednik Udruženja.

## **XIII POSTUPAK ZA IZMJENU I DOPUNU STATUTA**

### **Član 54.**

(1) Skupština je nadležna za donošenje Statuta, izmjene i dopune Statuta i drugih općih akata određenih Statutom.

(2) Izmjene i dopune Statuta Udruženja usvaja skupština, dvotrećinskom većinom glasova ukupnog broja članova.

(3) Inicijativa se upućuje upravnom odboru koji priprema tekst nacрта izmjene i dopune Statuta Udruženja.

### **Član 55.**

(1) Udruženje može pored Statuta imati i druga opća akta.

(2) Organi Udruženje donose opće akte Udruge: pravilnike, poslovnike i odluke koji moraju biti u suglasnosti sa Zakonom i ovim Statutom.

## **XIV SPAJANJE I PODJELA I PRESTANAK UDRUŽENJA**

### **Član 56.**

(1) Udruženje se može spojiti i podijeliti samo u drugo udruženje, u skladu sa Zakonom.

(2) Odluku iz prethodnog stava donosi skupština 2/3 svih članova skupštine Udruženja.

(3) Ovom odlukom regulira se naročito: naziv, sjedište, djelatnost, podjela imovine, prava i obaveze kao i druga pitanja u vezi statusnih promjena Udruženja.



## **Član 57.**

- (1) Udruženje može prestati sa radom dobrovoljno na osnovu odluke skupštine ili po sili zakona.
- (2) Inicijativu za prestanak rada Udruženja može dati 1/3 članova Udruženja, u slučaju:
  - a) nadležni organ udruženja donese odluku o prestanku rada ili odluku o spajanju i podjeli udruženja;
  - b) se utvrdi da je udruženje prestalo djelovati.
2. Smatrat će se da je udruženje prestalo djelovati kada:
  - a) je proteklo dvostruko više vremena od vremena utvrđenog statutom udruženja za održavanje skupštine udruženja, a skupština, odnosno upravni odbor, nije održan;
  - b) se broj članova udruženja smanji ispod broja tri, a nadležni organ udruženja u roku od tri mjeseca od nastupanja ove okolnosti ne donese odluku o prijemu novih članova udruženja;
- (3) Odluku o dobrovoljnom prestanku rada donosi skupština udruge 2/3 svih članova skupštine Udruženja.
- (4) Istovremeno skupština donosi plan likvidacije Udruženja, kojim se utvrđuje raspored imovine, prava i obaveze Udruge Zakonom i ovim Statutom, s tim što je prethodno obavezno izmiriti zakonske i ugovorne obaveze.
- (5) Skupština imenuje likvidatora Udruženja, čija dužnost je da sastavi plan likvidacije imovine Udruženja.
- (6) Preostala imovina, nakon podmirenja obaveza iz prethodnog stava, će se dodijeliti drugom udruženju, koje obavlja iste ili slične statutarn djelatnosti, a na osnovu odluke skupštine Udruženja.

## **Član 58.**

Udruženje prestaje sa radom po sili Zakona u skladu sa članom.51. i 52. Zakona.

## **XV ZAVRŠNE ODREDBE**

### **Član 59.**

Tumačenje odredbi ovog Statuta daje skupština Udruženja.

### **Član 60.**

Danom stupanja na snagu ovog Statuta, prestaje da važi Statut Udruženja fizioterapeuta u Bosni i Hercegovini, broj: 1/2005 od 15.01.2005. godine.

**Član 61.**

Ovaj Statut stupa na snagu danom donošenja.

Broj: 8/17  
Datum: 21.01.2017. godine

PREDSJEDNIK SKUPŠTINE UDRUŽENJA

---

Amir Handžić